

Kerajaan pertimbang tingkat kadar pembiayaan PTPTN

PM jamin terus komited salur bantuan ikut keperluan pelajar

Oleh Mohd Nasaruddin Parzi dan A'qilah Riduan
bhnews@bh.com.my

Gombak: Kerajaan menimbang untuk meningkatkan kadar pembiayaan Perbadanan Tabung Pinjaman Tinggi Nasional (PTPTN), di samping menangani isu hutang tertunggak yang tinggi, kata Datuk Seri Anwar Ibrahim.

Perdana Menteri berkata, kerajaan perlu juga menangani hutang terkumpul semasa PTPTN sebanyak RM40 bilion yang dijangka meningkat hingga RM50 bilion jika semakan semula pembiayaan dilakukan.

Beliau yang juga Menteri Kewangan berkata Kementerian Pendidikan Tinggi (KPT) sudah meneliti keperluan itu.

"Insya-Allah, kita cuba menilai semula (kadar pembiayaan) PTPTN ini. Bagaimanapun, hutang terkumpul semasa PTPTN ketika ini berjumlah hampir RM40 bilion dan penilaian semula pembayaran ini boleh mendorong (naik) kepada RM50 bilion.

"Buat masa ini, saya lihat kita hanya perlu bertahan. Kita akan bantu pelajar dari segi keperluan mereka, tetapi saya rasa kita ada tekad untuk membuat semakan semula.

"Namun, kami akan terus



Anwar beramah mesra dengan hadirin pada program Meet Anwar @IUM di Gombak, semalam.

(Foto Eizairi Shamsudin/BH)

membantu pelajar berdasarkan keperluan mereka," katanya ketika mengulas soalan diajukan seorang pelajar pada program Meet Anwar @IUM di sini semalam.

Sesi dialog terbuka Meet Anwar @IUM dihadiri kira-kira 3,000 orang.

Turut hadir, Rektor UIAM, Prof Emeritus Datuk Dr Osman Bakar serta Timbalan Menteri Pendidikan Tinggi, Datuk Mustapha Sakmud.

Berdasarkan semakan rekod pembiayaan universiti awam (UA), PTPTN menawarkan beberapa pakej pembiayaan kepada pelajar sepenuh masa di UA, Politeknik dan Kolej Komuniti, di mana peringkat diploma, mene-

rima kadar maksimum RM4,750 setahun, sementara ijazah sarjana muda (sains), RM6,650; ijazah sarjana muda (sastera), RM6,180; ijazah sarjana, RM9,500 dan RM24,700 bagi doktor falsafah (PhD).

Tampung keperluan pelajar

Bagi institusi pendidikan tinggi swasta (IPTS), peringkat diploma menerima kadar pembiayaan maksimum RM6,800 setahun; diploma (farmasi, pergigian dan sains kesihatan), RM12,750, sementara ijazah sarjana muda (sains), RM14,030; ijazah sarjana muda (sastera), RM13,600; ijazah sarjana muda (farmasi, pergigian dan sains kesihatan), RM17,000 serta ijazah sarjana

muda perubatan, RM50,000.

Mengulas lanjut, Anwar berkata, pendekatan kerajaan dalam memastikan golongan kaya membayar cukai lebih tinggi, bertujuan membolehkan antaranya hasil itu dipindah serta digunakan bagi menampung keperluan dan manfaat pendidikan pelajar miskin.

"Sekiranya orang kaya, contohnya ibu bapa yang kaya, menyumbang lebih banyak (bayar cukai), kita boleh mengagihkan semula sumber itu untuk menyokong pelajar (miskin).

"(Namun) ini adalah sebuah negara demokrasi. Jika kerajaan menaikkan cukai, pembangkang akan menyerang saya dengan ganas," katanya.

Bagaimanapun, katanya, peningkatan kutipan cukai hanya akan memberi kesan ke atas kelompok 15 peratus golongan berpendapatan tinggi, sementara bakiannya iaitu 85 peratus lagi tidak terkesan.

"Jika kamu tinggal di rumah besar yang memiliki 10 bilik, enam pendingin hawa dan lima kipas, kamu tidak sepatutnya membayar kadar elektrik yang sama seperti rakyat biasa. Oleh itu, 85 peratus penduduk tidak akan terjejas," katanya.

Dalam pada itu, Anwar yang juga Pengerusi ASEAN turut menjelaskan Malaysia kini menjadi negara ASEAN yang memperuntukkan subsidi paling tinggi kepada rakyatnya.